

Ra Byaekngaih

Seizcin, mbwn ngamq rongh, gou caeuq daiq daeuj daengz Dunghhih Cunh ra byaekngaih. Go’ngaih dwg hauhlawz yiengh ni? Mwh lij youq ranz, gou youq gwnz vangj caz gvaq swhliu, mwngz gag sawq ra.” Gou maeuq roengzdaeuj, ngeixdauq go—ngaih dwg baenzlawz yiengh, ciuq gij yiengh de bae ra, hoeng gou yawjraen gij mbaw doengh go rum haenx, mbouj dwg saeq lai couh dwg mbouj miz gij heiqrang daegbied. Gou vueng lo, beng gokbuh yahdaiq cam naeuz: “Daiq ha, gizneix mbouj miz go’ngaih ni!” Yahdaiq riunyumnyum, vix caz rum hai va ndeu naeuz: “Go neix dwg go’ngaih vahenj, hix dwg cungj go—ngaih ndeu, de ndaej aeu ma guh gyaujswj byaekngaih, caemh feihgwn bw!” Gou buet daengz baihnaj caz rum hai va haenx, maeuq youq bangxhenz sijsaeq yawj go’ngaih vahenj. Mbaw ngaih vahenj gij bien de lumj deng vunz sijsaeq raed gvaq, gwnz mbaw dwg saek mong heuoiq; gij va de caemh dwg saek henjoiq, ndeiyawj raixcaix.

Gvaqringz le, nditndat manh yaek dai, dou daeuj daengz aen mbanj ndeu yietnaiq. Gou doeng yawjyawj sae gyaepgyaep, sawqmwh yawjraen gokciengz miz baq rum ndeu, gou raen gij mbaw de najsug dangqmaz, caeuq gou youq gwnz vangj yawjraen gij mbaw go’ngaih doxdoengz liux. Gou byaij gvaqbae mup le mup, cungj heiqrang daegbied ndeu doq ndonj haеuj ndaw ndaeng gou bae. Gou gig angq, hemq naeuz: “Daiq ha, go neix dwg mbouj dwg go’ngaih ne?” Yahdaiq daeuj daengz gizgyawj yawj le, ceh da riu lumj ndwen ngaеu naeuz: “Dwg ha, go neix couh dwg go’ngaih.” Baenznanz le cij ndaej ra raen go’ngaih, gou gik—doengh dwk diuq hwnjdaeuj. Gou youq mwnq de mbaet byaekngaih, sim’angq dangqmaz, gig vaiq cix cang rim lamz ndeu lo.

Gwnz loh ma ranz, gou siujsim



lili umj aen lamz cang byaekngaih rim haenx, lumj ndaej umj seizcin youq ndaw rungj nei. Mup daengz gij heiqrang byaekngaih, ndaw uk gou hainduj siengj daengz le gij feih mwh gou haeb aen ceizngaih, gij hamh duhhoengz muz yungz haenx conh okdaeuj, diemzsubsub vannyumnyum……

(Cangh Yijcinz sij Veiz Munglingz hoiz)



Baihlaeng ranzmbanj, miz diuz rij iq raemx saw raen daej ndeu, haenx dwg aen suenangq seiznyez gou.

Diuz rij iq gig feuz, giz ceiq laeg cix hamj mbouj gvaq gyaеujhoq gou. Goenj rinmaxluenz youq laj daej rij hix yawj ndaej cingcuј, bya iq、nyauh youq gyang rinmaxluenz doxndoj. Seizhah, duzgoep ceiq maij bae henz rij iq ciengq go, aenvih diuzrij raemx laevauvau neix cungj gig mizsim bang gyoengqde buenxcienqg.

Geiqndaej mwh doeg youwzyenz, moix bi sujgyaj gou cungj aeu caeuq daxboh ma ranzmbanj. Baez ma daengz ranzmbanj, gou couh dingj mbouj ndaej rag daxboh, iu gobiuj caeuq nuengxbiuj, daiq muengx dwkbya、doengjraemx daengj, angqvauvau dwk buet bae rij iq. Daeuj daengz henz rij, dou goq mbouj ndaej vid gavaq, couh diuq roengz rij bae caij raemx guhcaemz. Raemxrij lumh din gou, gamjdaengz liengzsisi, gij ndat hwngq cungj bienq liengz lo.

“Lauz bya lo!” Guhcaemz le haujlai nanz, daxboh riuahaha daezsingj dou. “Daeuj lo!” Gou caeuq nuengxbiuj singhung han, gig vaiq couh buet daengz henz rij, daj ndaw doengjraemx dawz aen gyoengz—muengx caepcawq lauз bya. Gou sijsaeq cazyawj, giz liz gou mbouj gyaе, miz bang bya iq ndeu comz youq henz goenj rin, couh rag nuengxbiuj coemj gvaqbae, gaem aen gyoengzmuengx haenx luenh lauз. Gobiuj ganjvaiq heuh dou daengx: “Sou cungj haep bya deuz liux lo, baenzlawz lauз ndaej bya ne?” Nuengxbiuj gaeu gyaеuj cam: “Yienghneix baenzlawz lauз bya ne?” Gobiuj saenzmaed riu, naeuz: “Yawj gou!” Gangj le, de dawz fan muengx dwkbya ndeu okdaeuj, heuh gou caeuq nuengxbiuj boux gaem song gyaеuj, youq donh rij baihlaj bu hai, yienzhaeuh heuh dou rag fan muengx dwkbya menhmenh byaij hwnj donh rij baihgwnz bae. Dou siujsim lili dwk yamq din, lwgda gaenjcieng cimyawj gwnz raemx. Gij bya iq ndaw rij haenx lumj cuengqsoeng mbouj singjgaeh lo, gig vaiq couh haеuj muengx dou daеuj. Gvaq yaep ndeu, dou couh lauз ndaej haj roek duз bya iq.

Lauз bya sat le, dou youh youq ndaw rij iq ra gij rinmaxluenz gyaеundei. Gou moix ra ndaej ndaek rinmaxluenz simgyaez ndeu, couh angqyangz dwk, yaengx sang hwnjdaeuj hawj daihgya yawjyawj. Hoeng nuengxbiuj yaep ndeu gip hwnj goenj rinmaxluenz neix, yaep ndeu youh cuengq goenj rinmaxluenz haenx roengzdaeuj, nauhbod naeuz: “Goenj rin neix hix ndeiyawj, goenj rin haenx hix ndeiyawj, dauqdaeј genj goenj lawz ne?” O, rinmaxluenz ndaw rij iq, goenjgoenj cungj lumj deng vunz aeu fouj gyak gvaq nei, saenzgeiz dangqmaz!

Mbwn menhmenh laep lo, dou sij mbouj ndaej bae ranz. Diuz rij iq youh hoizfuk caemdingh lo, cij miz ronghndwen ronghsagsag ciuq youq gwnz raemx.

Diuz rij iq ranzmbanj gou, couxdawz gij seizgan mbouj you haenx, itcig lae youq ndaw sim gou.

(Cwnggh Yimungz raiz Veiz Cwngzgij hoiz)

Ndwenngoenz Vaiqvued Lajmbanj

Ndaw ngoenzgyaj, gou daeuj daengz laeng daxbuz lajmbanj. Youq gizneix, gou guh gvaq haujlai saeh yinxdaeuz youq ndaw singz mbouj miz banhfap guh haenx, daegbied dwg vat duzndwen caeuq ep duzbaeu, haenx caen dwg duenh ginglig nanzlumz ndeu ha!

Banhaet, ndit con gvaq geh mbawfaex set youq gwnzdieg, hawj daengx mbanj longz hwnj geu buh saekgim. Gou caeuq gyoengq doengzdoih iq daiq doengj iq caeuq fagcanj iq, angqvauvau daeuj daengz gyangdoengh, caepcawq vat duzndwen. Dou yaeng’yaeng buedhai cazrum, yungh fagcanj iq siujsim sisi fan naeznamh. Yaep ndeu, duз ndwen hoengzndaem ndeu couh cakyledyed youq dangqnaj dou, de youq ndaw namh baenq bae baenq dauq, lumjnaeuz cingq ndaq dou nyauxluenh de hawj de mbouj ndaej youq dingh. Dou angq dwk gip de hwnjdaeuj cuengq haеuj ndaw doengj iq bae, caiq bae ra duз moq. Yaepyet, ndaw doengj iq couh cang le haj roek duз ndwen.

Vat duzndwen sat le, dou youh daeuj daengz henz dah ep duzbaeu. Dou ra sienq caeuq ganjset daeuj, dawz gij ndwen youh feih youh ndeigwn haenx con youq gwnz sienq, caiq dawz de venj youq gwnz ganjset, yienzhaeuh dawz sienq cuengq roengz ndaw dah, fwngz gaem ganjset. Yaep ndeu, couh miz duzbaeu haeb set lo, dou yaeng’yaeng dawz duzbaeu rag hwnj hamq, yawj de vad song faj gimz, ndaw sim gou youh angq youh gaenjcieng. Dou dawz duzbaeu cuengq haеuj ndaw doengj iq, laebdaeb ep lingh duз. Duзbaeu ndaw dah neix lai dahraix, yaep ndeu, doengj iq couh cang rim lo.

Youq ndaw ndwenngoenz lajmbanj, gou lij guh le haujlai saeh mizyinx, lumjnaeuz: Mbaet mak、cuengq yiuhrumz、gaeb duзnon…… Youq gizneix, gou ndaej liz gij nauhyied caeuq hoengghwd ndaw singz gyaе’gyae, gamjsouh gij caemdingh caeuq gyaеundei ndaw doengh. Dou youq ndaw doenghnaz buetyat, youq henz dah iq coemj bya, youq ndaw suenmak cimz mak, gvaq le aen ngoenzgyaj angqvau ndeu.

Youq ndaw ndwenngoenz lajmbanj, yinxdaeuz caeuq doeksaet angq rim ngoenz liux. Gou maqmuengh ngoenzgyaj baezlaeng caiq baez daeuj daengz gizneix, gvaq gij saedcej vaiqvued lajmbanj.

(Cangh Yenhih raiz Lingz Hinghningz hoiz)